



Kamis, 31 Desember 2020

Ogen: 1 Samuel 7:12



Seh Ijenda Tuhan Enggo Nampati



La sitik pengalamen geluh manusia si jadi sejarah, turi-turin, motivasi man kalak sideban. Kuga Dibata erdahin, nampati ia, mulahi ibas perbeben, ngangkat ia paksa ia kote ras sidebanna. Bagepe bangsa Israel 'jatuh bangun' kinitekenna, Samuel selaku Nabi Dibata tetap mpersingeti bangsa enda gelah tetap nembah Dibata, nadingken dibata-dibata ras sembah-sembahen si mpedauh ia ibas Dibata nari. Samuel maba persembahen man Dibata sanga bangsa enda perang ras bangsa Pilistin. Bangsa e jine mindo man Samuel sabab mbiar ia kerina nandang iimbangna e. Dibata ngaloi pertoton bangsa enda, ipulahi ras isampati bangsa e, ibahanna lenggur i langit, bene ukur kalak Pilistin jenari kiam ia lanai erturi-turin kerina. Ndarat bangsa Israel I Mispa, iayak-ayakna kalak Pilistin. Ngidah sienda, ibuat Samuel sada batu itamakenna ikelang-kelang Mispa ras Jesana nina 'Dibata enggo nampati kita seh ku ingan enda' jenari igelarina ingan e 'Batu Penampat' (Eben Haezer). Pernah nge kita erbahan tanda-tanda, peringeten kerna geluhta ras perbahanen Dibata ibas geluhta? Paksa enda, seh kita ku pengujung tahun 2020, bengket kita ku tahun 2021, sedekah 365 wari tahun enda, tentuna la sitik perbahanen Dibata simbelin enggo nemani kita. La saja covid-19 si jadi berita simbelin dengen kuga erbage kebiasanta si arus iubahken, kita arus eradaptasi ras situasi sibage rupa. Enda kerina pengalamen simbelin man banta, la saja secara doni, kesehaten, social ras budayata si berubah termasuk penembahenta man Tuhan melala perubahen. Tapi sipenting ingetlah Dibata la pernah berubah ibas keleng ateNa, kitape ula kal mobah kinitekenta asa bancina reh belinna, reh paguhnalah min. Mari, sitatap ku lebe, nerusken perdalanan geluhta. Ninta man dirinta ras isi jabuta sebage komitmenta selaku kalak sierkiniteken, seh ijenda Tuhan enggo nampati kita. Emaka tekkal kita maka wari-warinta sipepagi pe IA tetap nampati kita. Wari enda tanggal 31 Desember tahun 2020, mari sibahan tanda peringetenta, subuk alu erbahan kebaktin, rende muji Tuhan, erbahan tanda kebersamaan, nta foto gelah denggo jadi tanda peringeten man banta ras anak kemputa.



Blank writing area with a wavy top edge.